



Te citadine lussemburghese zimulate cun Flaiban e je une vie cul nom dal país furlan e un place dedicate a Enio Picco. » DI FLAVIO VIDONI

## Tocs di Friûl tal Grant Ducât

Intal paisut di Fennange, un borc deliziôs ae periferie de citadine lussemburghese di Bettembourg, la strade di ingrès intune gnovissime lotizazion e puarte, za di cualchi setemane, il non di Flaiban. A metât di "Rue Flaibano", si vierç une grande place là che su di jê a son in face, di une bande e di chê altre, bielîs vilis in schirire: e je la "Place Ezio Picco". Sì,

la citadine che za di 27 agns e je zimulate cun Flaiban, e à no dome dedicate une des sôs gnovis stradis a une des sôs dôs localitâts zimulis (chê altre e je la portoghese Valpaços), ma ancje al principâl promotôr dal zimulament di bande flaibane, il sindic che intal 1989 al firmà l'at di amicizie. La inaugurazion uficiâl di Rue Flaibano e di Place **Ezio Picco** e avignî ae

fin di jugn, ae presince des autoritâts dal puest e di pu-trops abitants, e ancje di une delegazion flaibane vuidade dal sindic **Luche Picco**. La cerimonie di inaugurazion e fo precedude di une messe celebrade inte gleseute di Fennange, organizade dal deus ex machina del zimulament betemburghês cun Flaiban, **Domenico Picco**, in sufragji dai flaibans muarts intal Grant Ducât.

Cheste ocasion e je servide par dâ un gnûf sburt a une ativitât di scambi mai interote, che e à viodût i sodalîs, ma a so timp ancje lis scuclis, a lunc impegnâts sui doi fronts cun diviersis ativitâts. Tra i prossims impegnîs e je la presince di boy scouts di Flaiban par chualchi zornade a Bettembourg, prime di rivâ a Citât di Lussemburc pal Jamboree mondiâl dal 2017; su chel altri front, une mostre di sculturis di un impuartant artist betemburghês a Flaiban, in ocasion de inaugurazion de Cjase dai Alpîns, cjase che une emigrade flaibane di seconde gjenerazion a Bettembourg, **Diana Bizzaro**, pe cronache femine dal sindic atuâl **Laurent Zeimet**, e à regalât al Comun furlan. In viste po de probabile fusion dal Comun di Flaiban cun altris Comuns vicinants, il sindic Picco al à sigurât i amîs lussemburghês che dut chest nol larà a incidi in maniere negative su la tignude dal zimulament.



redazione@ilfriuli.it

### ■ GNÛF MANUÂL

#### Trente aigns di grafie unificate de lenghe

Ai 15 di Lui dal 1986 e Avignive fate buine dal Consei Provinciâl di Udin, in cunvigne cu lis Provincis di Gurize e Pordenon, la propueste par une grafie unificate de lenghe furlane. A 30 aigns di chê date i protagoniscj di îr e di vuê si son dâts apontament par ricuardâ chel travuart presentant il gnûf manuâl de grafie in version plurilengâl (furlan, talian, inglês e spagnûl).

"Obietif de ARLeF al è ancje chel di promovi la cognossince e l'ûs de grafie uficiâl de lenghe furlane in ogni ambit de vite sociâl" al à dit il president, **Lorenzo Fabbro** intal so intervent introdutif, li de sede de Regjon, a Udin, in ocasion de celebrazion dal Trentesim aniversari de aprovazion de grafie de lenghe furlane. "La publicazion che o presentin vuê e contribuirà a rinfuarçâ ancjemò di plui la difusion de grafie uficiâl".

### SCOLTADIS DI DRIUS

#### Come bananis

Certis feminis e son come les bananis: escomenzin a sei buinis dentri co e diventin brutis fûr.

Euronews informa

## Gnûf Statût de Regjon, Fontanini: "Umiliade la identitât dal Friûl"

Il dam al è grant. Triest al cjate une gnove istituzion, la citât metropolitana intant che, di chê altre bande, il Friûl nol à plui un ent che lu rapresente stant che al ven massacrât in tantis picjulis e ancjemò confondudis realtâts. Un confront sbelançât che al viodarà il Friûl simpri plui penalizât e la aree juliane favoride in maniere nete. Come se nol bastàs, a agravâ cheste framentazion amministrative e identitarie l'acentrament progressif di ogni podê in man ae Regjon, a Triest, organism che, ae origjin, al veve di interessâsi di legjiferâ, programâ e controlâ, cumò si cjatarà a gjestî ancje une masse impuartante di istrutoriis e iters burocratics. In barbe ae semplificazion. No je cheste la nestre storie, la storie di une Regjon che e à valorizât i territoris, lis singulis comunitâts". Al è il coment dal

president de Provincie di Udin Pietro Fontanini su la seconde leture de bande de Cjamare dai Deputâts che e à aprovât in vie definitive il gnûf Statût dal Fv che al elimine in maniere definitive lis Provincis. "18 Unions teritoriâls intercomunâls tal puest di 4 Provincis. Pardabon un brut esempli di razionalizazion e spending review chel che al fruce la identitât dal Friûl, la autonomie dai Ents locâi, al impon lis fusions di Comuns (cuant che la int e je contrarie) e al acentre in cjâf ae Regjon tantis competencis amministrativis; a jessi favorît al è dome Triest. Ve ce che e consegne ae nestre Regjon la aprovazion definitive de bande de Cjamare de modificazion dal Statût Fv - al zonte Fontanini -. Un primât che si è niçade za a svantâsi la presidente Serracchiani ma nol sarà sigûr un primât par eficiencia e, soreddut, pal contigni-



Il president de Provincie di Udin Pietro Fontanini

ment de spese che dal sigûr e cressarà par efiet dal trasferiment dai dipendents des Provincis ae Regjon e pe gnove gjestion des Uti, organismis che la lôr situazion, ae lûs des ultims sentencis dal Tar Fv che al à sanzionât la Regjon cuintri il podê sostitutif dai commissaris, e je a dî pôc complicade e confondude". E il senari in Fv al podarès complicâsi cul referendum di Autun. "In câs di vôt cuintri de riforme costituzionâl - al vise il president - la "gnove cjarte" dal Fv e va a pericol di destabilizâ l'asset dal guvier locâl no plui conformi ae Costituzion (che di cheste al diven il Statût) cence previodi lis Provincis confermadis intal rest di Italie. Ce fasaraie la presidente Serracchiani? Riabilitaraie lis Provincis che si è tant impegnade a tirâ vie? Al jere miôr spietâ i risultâts de consultazion populâr par no creâ conflits istituzionâi cence precedents in Fv".